

## Vunn de Schdookaude

Omm Somsdaach bin ich emol enausgefahrr onn de Falkeberrsch, weil isch wollt merr emol oogugge, was doo in de Schdookaude gemacht werrd. Wonn merr nemlich meddem Audo nooch Hochem fahrr dut, sieht merr uff de link Seit unn geescheiwwer vunn dem Reiterhof su Bagger unn Geräte stieh unn sieht aach im Vorbeifahrr, dass doo gons schee geschafft worrn iss.

Isch habb dess Audo uff dem Weesch zu de Wissemiehl abgestellt unn bin emol doohie geloffe, um ze gugge, was doo gemacht werrd. Isch habb de erst gedenkt, josses naa, doo werrd joo schunn widder ebbes plattgemacht unn ess werrn Hochemer Woiberrsche oogeleschd, awwer donn hotts doch nitt su ausgeseh unn isch habb vor mich hie gebrummelt: Doo hawwe se Beem unn Bisch abgehackt, weil alles soll halt schee ordentlich ausseh unn uff die Veeschelscher, die sich doo ihr Nessder hädde baue wolle, werrd koo Ricksicht genumme.

Unn gebrummeld habb isch immer noch, wie isch moin ahle Kummbeer Schorsch später oogerufe habb. Wie isch dem dess verzähle wollt unn mett Schenne uffs Plattmache unn Beem abhacke oogefonge habb, hodder mich gleich unnerbroche: Honnes, seeder, isch habb in de Moospitz gelese, was doo gemacht dut werrn unn dess dut sich halt e bissi onnersders ooheern als abhacke unn plattmache.

No, saach isch, donn dus merr mol verzähle.

Unn doo hott merr de Schorsch verzählt, dass dess e Nadurschutzgebiet iss unn aach bleiwe dut, ohne vill Beem unn Bisch unn doodeferr mett Gras, wies uff dem Kalkboden wachse dut, uff dem sich die Eidechse in de Sunn ausstrecke kenne.

Donn seet de Schorsch noch: Honnes, isch waaß aach, warum dich dess indressiern dut unn mich joo aach.

Unn donn hawwe merr driwwer geschwätzt wie merr Buwe warn unn jed Woch emol doo enaus sinn, weil doo warn die Schdookaude noch voller Hibbel voll mett Spieschelgras, in dess merr uns enoi geleeschd hawwe, unn hinner jedem Hibbel hädde sich joo enn Indianer ooschleiche kenne, den merr bekämpfe missde, unn doo hotts die Wolfschlucht unn die Euleschlucht gewwe unn de Kamelebuggel unn iwverall sinn merr erum, hawwe Feierscher gemacht unn die paar Kadoffele, die merr dehoom geklaut hadde, ins Feier geworfe unn donn mettsomd de verbrennde Schale gefudderd, unn nix debei gesse wie ab unn zu e Geelerieb. Unn monschmol warn merr de gonse Daach drauße, warn elf oder zwölf Johr alt unn unser Mudder hott uns gieh losse unn hott nie droo gedenkt, dass uns ebbes bassiern kennt.

Unn donn warn merr aus de Schul, hawwe ebbes gelernt, hawwe geheirat, hawwe Kinner großgezoh unn Heiser gebaut unn als donn die Kinner e bissi greeßer warn unn mir dene mol die Schdookaude zeiche wolde, doo hotts koo Wolfschlucht unn koo Euleschlucht unn koon Kamelebuggel mieh gewwe, dess war alles nimmi doo.

Honnes, seet de Schorsch, die Zeide wie bei uns duts nimmi gewwe, unn nitt nor weil die Schdookaude jetz e Nadurschutzgebiet iss.

Naa, saach ich, die Eldern heitzedaach losse ihr Kinner nimmi de gonse Daach drauße spille, unn wenn die Kinner mol heern solle, wie e Omsel flöte dut, kleppern se uff ihm Smartfon erum unn schunn dut dort die Omsel singe.

Koo Wunner, seet de Schorsch, dass die Kinner immer aggressiver werrn, die kenne sich nimmi ausdowe unn doo losse se ihr Wut onn ihrne Eltern, onn de Lehrer unn onn fremme Leit uff de Gass aus.

Eiern Honnes